Home > GACE BRULÉ > EDIZIONE > Pour verdure ne pour pree > Edizioni

## **Edizioni**

• letto 802 volte

# Huet

I.

Por verdure ne pour prée, Ne por fueille ne pour flor Nule chançon ne m'agree, Se ne muet de fine amor, Mais li faignant proieor, Dont ja dame n'iert amée, Ne chantent fors qu'en pascor, Lors se plaignent sanz dolor.

### II.

Dame tieng a esgarée
Qui croit faus dru menteor,
Car honte a longue durée
Qui avient par tel folor;
Et joie a pou de savor
Qui en tel lieu est gastée,
S'en li a tant de vigor
Que hée sa deshonor.

## III.

Fause drue abandonnée Vuet les nos et puis les lor, Ne ja s'amor n'iert emblée Que nel sachent li plusor; Mais a dame de valour, Bele et bone et acesmée, Qui ne croit losengeor, Doit l'en penser nuit et jour.

### IV.

Mout m'a Amors atournée Douce paine et beau labour, Car ja por rien qui soit née N'oblierai ceste ceste hounour D'amer tote la meillour Qui soit par les bons loée; Mais de tant sui en error Qu'onques n'amai sens paor.

### V.

Tant s'est Amors afermée En mon cuer a lonc sejor Que j'ai plus haute pensée Que tuit li autre ameor; Mais li faus enquereor Font uevre malaürée, Engin de mainte color, Por torner joie a tristor.

### VI.

Dame, cele part ne tor Que m'amors ne soit doblée Et mi desconfort greignor, Dont je morrai sens retor.

• letto 604 volte

## Lerond

## I.

Pour verdure ne pour pree ne pour fueille ne pour flour nule chansons ne m'agree, se ne muet de fine amour; maiz li faignant proieour dont ja dame n'iert amee ne chantent fors qu'en paschour lors se plaignent sanz dolour.

### II.

Dame tieg pour enganee qui croit faus dru menteour, quar honte a longe duree qui avient par tel folour, et joie a pou de savour qui en tel lieu est gastee, s'en li a tant de vigour qu'ele het sa deshounour.

### III.

Fausse drue abandounee veut les nos et puis les lour,

ne ja s'amour n'iert emblee que nel sachent li plusour; maiz la dame de valour, bele et bone et acesmee, qui ne croit losengeour, doit on prisier nuit et jour.

### IV.

Mout m'a amours atournee douce painne et bel labour, ne ja pour rienz qui soit nee ne guerpirai ceste hounour d'amer toute la meillour qui soit par les bons loee; maiz de tant sui en errour c'onques n'amai sanz freour.

## V.

Bien s'est amours afermee en mon cuer a lonc sejour, que j'ai pluz haute pensee que tuit cist autre ameour; maiz li faus enquereour font oevre maleüree, engiens de mainte coulour, pour metre joie a tristour.

### VI.

Dame, cele part ne tour que m'amours ne soit doublee et mi desirrier greignour, dont je morrai sanz retour.

• letto 662 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911 CF 80209930587 PI 02133771002

**Source URL:** https://letteraturaeuropea.let.uniroma1.it/?q=laboratorio/edizioni-321